

四庫全書

集部

欽定四庫全書

集部
文編卷二十一

詳校官檢討臣德生

侍讀臣孫球覆勘

總校官進士臣楊懋珩

校對官編修臣汪鏞

謄錄監生臣周牧

欽定四庫全書

文編卷二十一

明 唐順之 編

伯陽甫論三川震

國語

幽王三年西周三川皆震伯陽父曰周將亡矣夫天地之氣不失其序若過其序民之亂也陽伏而不能出陰遁而不能烝于是有地震今三川實震是陽失其所而鎮陰也陽失而在陰源必塞源塞國必亡夫水土演而

民用也水土無演民乏財用不亡何待昔伊洛竭而夏
亡河竭而商亡今周德若二代之季矣其川源又塞塞
必竭夫國必依山川山崩川竭亡之徵也川竭山必崩
若國亡不過十年數之紀也夫天之所棄不過其紀是
歲也三川竭岐山崩十一年幽王乃滅周乃東遷

史蘇論驪姬敗國

國語

獻公伐驪戎克之滅驪子獲驪姬以歸立以為夫人生
奚齊其娣生卓子驪姬請使申生處曲沃以速懸重耳

處蒲城夷吾處屈奚齊處絳以徹亡辱之故公許之史
蘇朝告大夫曰二三大夫其戒之乎亂本生矣日君以
驪姬為夫人民之疾心固皆至矣昔者之伐也起百姓
以為百姓也是以民能欣之故莫不盡忠極勞以致死
今君起百姓以自封也民外不得其利而內惡其貪則
上下既有判矣然而又生男其天道也天彊其毒民疾
其態其亂生哉吾聞君子好好而惡惡樂樂而安安是
以能有常伐木不自其本必復生塞水不自其源必復

流滅禍不自其基必復亂今君滅其父而畜其子禍之
基也畜其子又從其欲子思報父之耻而信其欲雖好
色必惡心不可謂好好其色必授之情彼得其情以厚
其欲從其惡心必敗國且深亂亂必自女戎三代皆然
驪姬果作難殺太子而逐二公子君子曰知難本矣

卻叔虎論伐翟桓國語

獻公田見翟桓之氛歸寢不寐卻叔虎朝公語之對曰
牀第之不安邪抑驪姬之不存側邪公辭焉出遇士蒍

曰今夕君不寐必為瞿祖也夫瞿祖之君好專利而不
忌其臣競諂以求媚其進者壅塞其退者距違其上貪
以忍其下偷以幸有縱君而亡諫臣有冒上而亡忠下
君臣上下各厭其私以縱其回民各有心亡所據依以
是處國不亦難乎君若伐之可克也吾不言子必言之
士為以告公說乃伐瞿祖

展禽論祀爰居

國語

海鳥曰爰居止于魯東門之外三日臧文仲使國人祭

之展禽曰越哉臧孫之為政也夫祀國之大節也而節
政之所成也故慎制祀以為國典今亡故而加典非政
之宜也夫聖王之制祀也法施於民則祀之以死勤事
則祀之以勞定國則祀之能禦大災則祀之能扞大患
則祀之非是族也不在祀典昔烈山氏之有天下也其
子曰柱能殖百穀百蔬夏之興也周棄繼之故祀以為
稷共工氏之伯九有也其子曰后土能平九土故祀以
為社黃帝能成命百物以明民共財顓頊能修之帝嚳

能序三辰以固民堯能單均刑法以儀民舜勤民事而
野死鯀鄴洪水而殛死禹能以德修鯀之功契為司徒
而民輯冥勤其官而水死湯以寬治民而除其邪稷勤
百穀而山死文王以文昭武王去民之穢故有虞氏禘
黃帝而祖顓頊郊堯而宗舜夏后氏禘黃帝而祖顓頊
郊鯀而宗禹商人禘舜而祖契郊冥而宗湯周人禘嚳
而郊稷祖文王而宗武王幕能帥顓頊者也有虞氏報
焉杼能帥禹者也夏后氏報焉上甲微能帥契者也商

人報焉高圉太王能帥稷者也周人報焉凡禘郊宗祖報此五者國之典祀也加之以社稷山川之神皆有功烈於民者也及前哲令德之人所以為民質也及天之三辰民所以瞻仰也及地之五行所以生殖也及九州名山川澤所以出財用也非是不在祀典今海鳥至已不知而祀之以為國典難以為仁且知矣夫仁者講功而知者處物亡功而祀之非仁也不知而不問非知也今茲海其有災乎夫廣川之鳥獸恒知而避其災也是

歲也海多大風冬煥文仲聞柳下季之言曰信吾過也
季子之言不可不法也使書以為三箴

內史過論晉君臣

國語

襄王使召公過及內史過賜晉惠公命呂甥卻芮相晉
侯不敬晉侯執王卑拜不稽首內史過歸以告王曰晉
不亡其君必無後且呂卻將不免王曰何故對曰夏書
有之曰衆非元后何戴后非衆無與守邦在湯誓曰予
一人有罪無以萬夫萬夫有罪在予一人在盤庚曰國

之臧則維女衆國之不臧則維予一人是有逸罰如是則長衆使民不可不慎也民之所急在於大事先王知大事之必以衆濟也故祓除其心以和惠民考中度衷以蒞之昭明物則以訓之制義庶孚以行之祓除其心精也考中度衷忠也昭明物則禮也制義庶孚信也然則長衆使民之道非精不和非忠不立非禮不順非信不行今晉侯即位而背内外之賂虐其處者棄其信也不敬王命棄其禮也施其所惡棄其忠也以惡實心棄

其精也四者皆棄則遠不至而近不和矣將何以守國
古者先王既有天下又崇立上帝明神而敬事之于是
乎有朝日夕月以教民事君諸侯春秋受職于王以臨
其民大夫士日恪位著以儆其官庶人工商各守其業
以共其上猶恐有墜失也故為車服旗章以旌之為贄
幣瑞節以鎮之為班爵貴賤以列之為令聞嘉譽以聲
之猶有散遷解慢而著在刑辟流在裔土於是乎有夷
蠻之國有斧鉞刀墨之民而況可以淫縱其身乎夫晉

侯非嗣也而得其位亶亶怵惕保任戒懼猶曰未也若將廣其心而遠其鄰陵其民而卑其上將何以固守夫執玉卑替其摯也拜不稽首誣其王也替摯無鎮誣王無民夫天事恒象任重享大者必速及故晉侯誣王人亦將誣之欲替其摯人亦將替之大臣享其祿弗諫而阿之亦必及焉襄王三年而立晉侯八年而隕于韓十六年而晉人殺懷公無胄秦人殺子金子公

單襄公言陳必亡

國語

定王使單襄公聘于宋遂假道于陳以聘于楚火朝覲
矣道弗可行也侯不在疆司空不視塗澤不陂川不
梁埜有庾積塲功未畢道無列樹墾田若藝膳宰不致
餼司里不授館國無寄寓縣無施舍民將築臺于夏氏
及陳陳靈公與孔寧儀行父南冠以如夏氏留賓弗見
單子歸告王曰陳侯不有大咎國必亡王曰何故對曰
夫辰角見而雨畢天根見而水涸本見而草木節解駟
見而隕霜火見而清風戒寒故先王之教曰雨畢而除

道水涸而成梁草木節解而備藏隕霜而冬裘具清風
至而修城郭宮室故夏令曰九月除道十月成梁其時
儆曰收而場功恃而畚揭營室之中土功其始火之初
見期于司里此先王之所以不用財賄而廣施德于天
下者也今陳國火朝覲矣而道路若塞埜場若棄澤不
陂障川無舟梁是廢先王之教也周制有之曰列樹以
表道立鄙食以守路國有郊牧疆有寓望藪有圃草園
有林池所以禦災也其餘無非穀土民無懸耜埜無奧

草不奪民時不蔑民功有優無置有逸無罷國有班事
縣有序民今陳國道路不可知田在草間功成而不收
民罷於逸樂是棄先王之法制者也周之秩官有之曰
敵國賓至闕尹以告行理以節逆之候人為導卿出郊
勞門尹除門宗祝執祀司里授館司徒具徒司空視塗
司寇詰奸虞人入材甸人積薪火師監燎水師監濯膳
宰致餐廩人獻餼司馬陳芻工人展車百官各以物至
賓入如歸是故小大莫不懷愛其貴國之賓至則以班

加一等益虔至于王使則皆官正蒞事上卿監之若王
巡守則君親監之今雖朝也不才有分族於周承王命
以為過賓於陳而司事莫至是蔑先王之官也先王之
令有之曰天道賞善而罰淫故凡我造國無從非彝無
即愾淫各守爾典以承天休今陳侯不念胤續之常棄
其伉儷妃嬪而帥其卿佐以淫于夏氏不亦瀆姓矣乎
陳我大姬之後也棄袞冕而南冠以出不亦簡彝乎是
又犯先王之令也昔先王之教茂帥其德也猶恐隕越

若廢其教而棄其制蔑其官而犯其令將何以守國居
大國之間而無此四者其能久乎六年單子如楚八年
陳侯殺于夏氏九年楚子入陳

單襄公論郤氏必亡

國語

晉既克楚于鄢使郤至告慶於周末將事王叔簡公飲
之酒交酌好貨皆厚飲酒宴語相說也明日王叔子譽
諸朝郤至見召桓公與之語召公以告單襄公曰王叔
子譽溫季以為必相晉國相晉國必大得諸侯勸二三

君子必先導焉可以樹今夫子見我以晉國之克也為已實謀之曰微我晉不戰矣楚有五敗晉不知乘我則彊之背宋之盟一也薄德而以地賂諸侯二也棄壯之良而用幼弱三也建立卿士而不用其言四也夷鄭從之三陳而不整五也罪不由晉晉得其民四軍之帥旅力方剛卒伍治整諸侯與之是有五勝也有辭一也得民二也軍帥彊禦三也行列治整四也諸侯輯睦五也有一勝猶足用也有五勝以伐五敗而避之者非人也

不可以不戰欒范不欲我則彊之戰而勝是吾力也且夫戰也微謀吾有三伐勇而有禮反之以仁吾三逐楚君之卒勇也見其君必下而趨禮也能獲鄭伯而赦之仁也若是而知晉國之政楚越必朝吾曰子則賢矣抑晉國之舉也不失其次吾懼政之未及子也謂我曰夫何次之有昔先大夫荀伯自下軍之佐以政趙宣子未有軍行而以政今欒伯自下軍往是三子也吾又過于四之無不及若佐新軍而升為政不亦可乎將必求之

是其言也君以為奚若襄公曰人有言曰兵在其頸其卻至之謂乎君子不自稱也非以讓也惡其蓋人也夫人性陵上者也不可蓋也求蓋人其抑下滋甚故聖人貴讓且諺曰獸惡其網民惡其上書曰民可近也而不可上也詩曰豈弟君子求福不回在禮敵必三讓是則聖人知民之不可加也故王天下者必先諸民然後庇焉則能長利今卻至在七人之下而欲上之是求蓋七人也其亦有七怨怨在小醜猶不可堪而況在侈卿乎

其何以待之晉之克也天有惡於楚也故儆之以晉而卻至佻天以為已力不亦難乎佻天不祥乘人不義不祥則天棄之不義則民勝之且卻至何三伐之有夫仁禮勇皆民之為也以義死用謂之勇奉義順則謂之禮畜義豐功謂之仁奸仁為佻奸禮為羞奸勇為賊夫戰盡敵為上守和同順義為上故制戎以果毅制朝以序成畔戰而擅舍鄭君賊也棄殺行容羞也畔國即讐佻也有三奸以求替其上遠于得政矣以吾觀之兵在其

頸不可久也雖吾王叔未能違難在大誓曰民之所欲天必從之王叔欲卻至能勿從乎卻至歸明年死難及伯輿之獄王叔陳生奔晉

單襄公論晉君臣

國語

柯陵之會單襄公見晉厲公視遠步高晉卻錡見單子其語犯卻犇見其語迂卻至見其語伐齊國佐見其語盡魯成公見言及晉難及卻犇之譖單子曰君何患焉晉將有亂其君與三卻其當之乎魯侯曰寡人患不免

於晉今君曰將有亂敢問天道乎抑人故也對曰吾非
瞽史焉知天道吾見晉君之容而聽三卻之語矣殆必
禍者也夫君子目以定體足以從之是以觀其容而知
其心矣目以處義足以步目今晉侯視遠而足高目不
存體而足不步目其心必異矣目體不相從何以能久
夫合諸侯國之大事也於是乎觀存亡故國將無咎其
君在會步言視聽必皆無謫則可以知德矣視遠日絕
其義足高日棄其德言爽日反其信聽淫日離其名夫

目以處義足以踐德口以庇信耳以聽名者也故不可不慎也偏喪有咎既喪則國從之晉侯奭二吾是以云夫卻氏晉之寵人也三卿而五大夫可以戒懼矣高位實疾憤厚味實腊毒今卻伯之語犯叔迺季伐犯則陵人迺則誣人伐則擄人有是寵也而益之以三怨其誰能忍之雖齊國子亦將與焉立于淫亂之國而好盡言以招人過怨之本也唯善人能受盡言齊其有乎吾聞之國德而鄰於不修必受其福今君偪于晉而鄰於齊

齊晉有禍可以取伯無德之患何憂於晉

北宮文子論威儀 左傳

衛侯在楚北宮文子見令尹圍之威儀言于衛侯曰令尹似君矣將有他志雖獲其志不能終也詩云靡不有初鮮克有終終之實難令尹其將不免公曰子何以知之對曰詩云敬慎威儀惟民之則令尹無威儀民無則焉民所不則以在民上不可以終公曰善哉何謂威儀對曰有威而可畏謂之威有儀而可象謂之儀君有君

之威儀其臣畏而愛之則而象之故能有其國家今聞
長世臣有臣之威儀其下畏而愛之故能守其官職保
族宜家順是以下皆如是是以上下能相固也衛詩曰
威儀棣棣不可選也言君臣上下父子兄弟內外大小
皆有威儀也周詩曰朋友攸攝攝以威儀言朋友之道
必相教訓以威儀也周書數文王之德曰大國畏其力
小國懷其德言畏而愛之也詩云不識不知順帝之則
言則而象之也紂囚文王七年諸侯皆從之囚紂于是

乎懼而歸之可謂愛之文王伐崇再駕而降為臣蠻夷
帥服可謂畏之文王之功天下誦而歌舞之可謂則之
文王之行至今為法可謂象之有威儀也故君子在位
可畏施舍可愛進退可度周旋可則容止可觀作事可
法德行可象聲氣可樂動作有文言語有章以臨其下
謂之有威儀也

公子札來聘

左傳

吳公子札來聘請觀於周樂使工為之歌周南召南曰

美哉始基之矣猶未也然勤而不怨矣為之歌邶鄘衛
曰美哉淵乎憂而不困者也吾聞衛康叔武公之德如
是是其衛風乎為之歌王曰美哉思而不愆其周之東
乎為之歌鄭曰美哉其細已甚民弗堪也是其先亡乎
為之歌齊曰美哉泱泱乎大風也哉表東海者其大公
乎國未可量也為之歌豳曰美哉蕩乎樂而不淫其周
公之東乎為之歌秦曰此之謂夏聲夫能夏則大大之
至也其周之舊乎為之歌魏曰美哉漚漚乎大而婉險

而易行以德輔此則明主也為之歌唐曰思深哉其有
陶唐氏之遺民乎不然何憂之遠也非令德之後誰能
若是為之歌陳曰國無主其能久乎自鄧以下無譏焉
為之歌小雅曰美哉思而不貳怨而不言其周德之衰
乎猶有先王之遺民焉為之歌大雅曰廣哉熙熙乎曲
而有直體其文王之德乎為之歌頌曰至矣哉直而不
倨曲而不屈邇而不偏遠而不攜遷而不淫復而不厭
哀而不愁樂而不荒用而不置廣而不宣施而不費取

而不貪處而不底行而不流五聲和八風平節有度守
有序盛德之所同也見舞象箭南籥者曰美哉猶有憾
見舞大武者曰美哉周之盛也其若此乎見舞韶濩者
曰聖人之弘也而猶有慙德聖人之難也見舞大夏者
曰美哉勤而不德非禹其誰能修之見舞韶箭者曰德
至矣哉大矣如天之無不憐也如地之無不載也雖甚
盛德其蔑以加於此矣觀止矣若有他樂吾不敢請已

晏嬰叔向論齊晉

左傳

齊侯使晏嬰請繼室於晉既成昏晏子受禮叔向從之
宴相與語叔向曰齊其如何晏子曰此季世也吾弗知
齊其為陳氏矣公棄其民而歸於陳氏齊舊四量豆區
釜鍾四升為豆各自其四以登於釜釜十則鍾陳氏三
量皆登一焉鍾乃大矣以家量貸而以公量收之山木
如市弗加于山魚鹽蜃蛤弗加于海民參其力二入於
公而衣食其一公聚朽蠹而三老凍餒國之諸市屨賤
踊貴民人痛疾而或燠休之其愛之如父母而歸之如

流水欲無獲民將焉辟之箕伯直柄虞遂伯戲其相胡公大姬已在齊矣叔向曰然雖吾公室今亦季世也戎馬不駕卿無軍行公乘無人卒列無長庶民罷敝而宮室滋侈道殣相望而女富溢尤民聞公命如逃寇讐樂卻胥原狐續慶伯降在皂隸政在家門民無所依君日不悛以樂惱憂公室之卑其何日之有讒鼎之銘曰昧旦丕顯後世猶怠況日不悛其能久乎晏子曰子將若何叔向曰晉之公族盡矣盼聞之公室將卑其宗族枝

葉先落則公從之。肸之宗十一族惟羊舌氏在而已。肸又無子。公室無度。幸而得死。豈其獲祀。

子產論伯有為厲

左傳

鄭人相驚以伯有。曰：「伯有至矣！」則皆走。不知所往。鑄刑書之。歲二月，或夢伯有介而行，曰：「壬子，余將殺帶也。」明年壬寅，余又將殺段也。及壬子，駟帶卒。國人益懼齊燕平之。月壬寅，公孫段卒。國人愈懼。其明，月子產立。公孫洩及良止以撫之，乃止。子大叔問其故。子產曰：「鬼有所」

歸乃不為厲吾為之歸也太叔曰公孫洩何為子產曰
說也為身無義而圖說從政有所反之以取媚也不媚
不信不信民不從也及子產適晉趙景子問焉曰伯有
猶能為鬼乎子產曰能人生始化曰魄既生魄陽曰魂
用物精多則鬼鬼彊是以有精爽至于神明匹夫匹婦
彊死其鬼鬼猶能馮依於人以為淫厲況良霄我先君
穆公之冑子良之孫子耳之子敝邑之卿從政三世矣
鄭雖無腴抑諺曰蕞爾國而三世執其政柄其用物也

弘矣其取精也多矣其族又大所馮厚矣而彊死能為鬼不亦宜乎

叔向論楚子干得國

左傳

子干歸韓宣子問於叔向曰子干其濟乎對曰難宣子曰同惡相求如市賈焉何難對曰無與同好誰與同惡取國有五難有寵而無人一也有人而無主二也有主而無謀三也有謀而無民四也有民而無德五也子干在晉十三年矣晉楚之從不聞達者可謂無人族盡親

叛可謂無主無釁而動可謂無謀為羈終世可謂無民
亡無愛徵可謂無德王虐而不忌楚君子干涉五難以
弑舊君誰能濟之有楚國者其棄疾乎君陳蔡城外屬
焉苛慝不作盜賊伏隱私欲不違民無怨心先神命之
國民信之芊姓有亂必季實立楚之常也獲神一也有
民二也令德三也寵貴四也居常五也有五利以去五
難誰能害之子干之官則右尹也數其貴寵則庶子也
以神所命則又遠之其貴亡矣其寵棄矣民無懷焉國

無與焉將何以立宣子曰齊桓晉文不亦是乎對曰齊桓衛姬之子也有寵於僖有鮑叔牙賓須無隰朋以為輔佐有莒衛以為外主有國高以為內主從善如流下善齊肅不藏賄不從欲施舍不倦求善不厭是以有國不亦宜乎我先君文公狐季姬之子也有寵於獻好學而不貳生十七年有士五人有先大夫子餘子犯以為腹心有魏犢賈佗以為股肱有齊宋秦楚以為外主有欒卻狐先以為內主亡十九年守志彌篤惠懷棄民民

從而與之獻無異親民無異望天方相晉將何以代文
此二君者異于子干共有寵子國有與主無施于民無
援于外去晉而不送歸楚而不逆何以冀國

子太叔對趙簡子問禮

左傳

子太叔見趙簡子簡子問揖讓周旋之禮焉對曰是儀
也非禮也簡子曰敢問何謂禮對曰吉也聞諸先大夫
子產曰夫禮天之經也地之義也民之行也天地之經
而民實則之則天之明因地之性生其六氣用其五行

氣為五味發為五色章為五聲淫則昏亂民失其性是
故為禮以奉之為六畜五牲三犧以奉五味為九文六
采五章以奉五色為九歌八風七音六律以奉五聲為
君臣上下以則地義為夫婦外內以經二物為父子兄
弟姑姊甥舅昏媾姻亞以象天明為政事庸力行務以
從四時為刑罰威獄使民畏忌以類其震曜殺戮為溫
慈惠和以效天之生殖長育民有好惡喜怒哀樂生於
六氣是故審則宜類以制六志哀有哭泣樂有歌舞喜

有施舍怒有戰鬪喜生于好怒生于惡是故審行信令
禍福賞罰以制死生生好物也死惡物也好物樂也惡
物哀也哀樂不失乃能叶于天地之性是以長久簡子
曰甚哉禮之大也對曰禮上下之紀天地之經緯也民
之所以生也是以先王尚之故人之能自曲直以赴禮
者謂之成人夫大不亦宜乎簡子曰鞅也請終身守此言
也

沈尹戌論子常城郢

左傳

楚囊瓦為令尹城郢沈尹戌曰子常必亡郢苟不能衛城無益也古者天子守在四夷天子卑守在諸侯諸侯守在四鄰諸侯卑守在四境慎其四境結其四援民狎其埜三務成功民無內憂而又無外懼國焉用城今吳是懼而城于郢守已小矣卑之不獲能無亡乎昔梁伯溝其公宮而民潰民棄其上不亡何待夫正其疆場修其土田險其走集親其民人明其五侯信其鄰國慎其官守守其交禮不僭不貪不懦不耆完其守備以待不

虞又何畏矣詩曰無念爾祖聿修厥德無亦監乎若敖蚡冒至于武文土不過同慎其四境猶不城郢今土數圻而郢是城不亦難乎

鬬旦論子常必亡

國語

鬬旦廷見令尹子常子常與之語問蓄貨聚馬歸以語其弟曰楚其亡乎不然令尹其不免乎吾見令尹令尹問畜聚積實如餓豺狼焉殆必亡者也夫古者聚貨不妨民衣食之利聚馬不害民之財用國馬足以行軍公

馬足以稱賦不是過也公貨足以賓獻家貨足以共用
不是過也夫貨馬郵則闕於民民多闕則有離畔之心
將何以封矣昔鬬子文三舍令尹無一日之積恤民之
故也成王聞子文之朝不及夕也于是乎每朝設脯一
束糗一筐以羞子文至于今令尹秩之成王每出子文
之祿必逃王止而後復人謂子文曰人生求富而子逃
之何也對曰夫從政者以庇民也民多曠者而我取富
焉是勤民以自封也死無日矣我逃死非逃富也故莊

王之世滅若敖氏唯子文之後在至於今處鄖為楚良臣是不先恤民而後已之富乎今子常先大夫之後也而相楚君無令名于四方民之羸餒日日已甚四境盈壘道殣相望盜賊司目民無所放是之不恤而畜聚不厭其速怨於民多矣積貨滋多畜怨滋厚不亡何待夫民心之愠也若防大川焉潰而所犯必大矣子常其能賢于成靈乎成不禮于穆願食熊蹯不獲而死靈王不顧于民一國棄之如遺迹焉子常為政而無禮不顧甚

於成靈其獨何力以待之期年乃有栢舉之戰子常奔鄭昭王奔隨

史墨論季氏出君

左傳

趙簡子問於史墨曰季氏出其君而民服焉諸侯與之君死於外而莫之或罪也對曰物生有兩有三有五有倍貳故天有三辰地有五行體有左右各有配耦王有公諸侯有卿皆有貳也天生季氏以貳魯侯為日久矣民之服焉不亦宜乎魯君世從其失季氏世修其勤民

忘君矣雖死於外其誰矜之社稷無常奉君臣無常位
自古以然故詩曰高岸為谷深谷為陵三后之姓於今
為庶主所知也在易卦雷乘乾曰大壯三三天之道也
昔成季友桓之季也文姜之愛子也始震而卜卜人謁
之曰生有嘉聞其名曰友為公室輔及生如卜人之言
有文在其手曰友遂以名之既而有大功於魯受費以
為上卿至于文子武子世增其業不廢舊績魯文公薨
而東門遂殺嫡立庶魯君於是乎失國政在季氏於此

君也四公矣民不知君何以得國是以為君慎器與名不可以假人

司馬錯與張儀爭論

戰國策

司馬錯與張儀爭論於秦惠王前司馬錯欲伐蜀張儀曰不如伐韓王曰請聞其說對曰親魏善楚下兵三川塞轅轅緱氏之口當屯留之道魏絕南陽楚臨南鄭秦攻新城宜陽以臨二周之郊誅周主之罪侵楚魏之地周自知不救九鼎寶器必出據九鼎按圖籍挾天子以

令天下天下莫敢不聽此王業也今夫蜀西僻之國而戎狄之長也敝兵勞衆不足以成名得其地不足以爲利臣聞爭名者于朝爭利者于市今三川周室天下之市朝也而王不爭焉顧爭於戎狄去王業遠矣司馬錯曰不然臣聞之欲富國者務廣其地欲強兵者務富其民欲王者務博其德三資者備而王隨之矣今王之地小民貧故臣願從事於易夫蜀西僻之國也而戎狄之長也而有桀紂之亂以秦攻之辟如使豺狼逐羣羊也

取其地足以廣國也得其財足以富民繕兵不傷衆而
彼已服矣故拔一國而天下不以為暴利盡四海諸侯
不以為貪是我一舉而名實兩附而又有禁暴正亂之
名今攻韓劫天子劫天子惡名也而未必利也又有不
義之名而攻天下之所不欲危臣請謁其故周天下之
宗室也韓周之與國也周自知失九鼎韓自知亡三
川則必將二國并力合謀以因于齊趙而求解乎楚魏
以禹與楚以地與魏王不能禁此臣所謂危不如伐蜀

之完也惠王曰善寡人聽子卒起兵伐蜀十月取之遂定蜀蜀主更號為侯而使陳莊相蜀蜀既屬秦益強富厚輕諸侯

田需對管燕

戰國策

管燕得罪齊王謂其左右曰子孰而與我赴諸侯乎左右默然莫對管燕連然流涕曰悲夫士何其易得而難用也田需對曰士三日不得厭而君鵠驚有餘食下宮揉羅紉曳綺縠而士不得以為緣且財者君之所輕死

者士之所重君不肯以所輕與士而責士以所重事君
非士易得而難用也

蘇代謂燕昭王

戰國策

蘇代謂燕昭王曰今有人於此孝如曾參孝已信如尾
生高廉如鮑焦史鰌兼此三行以事王奚如王曰如是
足矣對曰足下以為足則臣不事足下矣臣且處無為
之事歸耕乎周之上地耕而食之織而衣之王曰何故
也對曰孝如曾參孝已則不過養其親耳信如尾生高

則不過不欺人耳廉如鮑焦史鮑則不過不竊人之財耳今臣為進取者也臣以為廉不與身俱達義不與生俱立仁義者自完之道也非進取之術也王曰自憂不足乎對曰以自憂為足則秦不出殽函齊不出營丘楚不出䟽章三王代位五伯改政皆以不自憂故也若自憂而足則臣亦周之負籠耳何為煩大王之廷耶昔者楚取章武諸侯北面而朝秦取西山諸侯西面而朝曩者使燕毋去周室之上則諸侯不為別馬而朝矣臣聞

之善為事者先量其國之大小而揆其兵之強弱故功
可成而名可立也不能為事者不先量其國之大小不
揆其兵之強弱故功不可成而名不可立也今主有東
嚮伐齊之心而愚臣知之王曰子何以知之對曰矜戟
砥劍登丘東嚮而歎是以愚臣知之今夫烏獲舉千鈞
之重行年八十而求扶持故齊雖強國也西勞於宋南
罷於楚則齊軍可敗而河間可取燕王曰善吾請拜子
為上卿奉子車百乘子以此為寡人東游於齊何如對

曰足下以愛之故與何不與愛子與諸舅叔父負床之
孫不得而乃以與亡能之臣何也王之論臣何如人哉
今臣之所以事足下者忠信也恐以忠信之故見罪於
左右王曰安有為人臣盡其力竭其能而得罪者乎對
曰臣請為王譬昔周之上地嘗有之其丈夫宦三年不
歸其妻愛人其所愛者曰子之丈夫來則且奈何乎其
妻曰勿憂也吾已為藥酒而待其來矣已而其丈夫果
來于是因令其妾酌藥酒而進之其妾知之半道而立

慮曰吾以此飲吾主父則殺吾主父以此事告吾主父
則逐吾主母以殺吾主父逐吾主母者寧佯躋而覆之
于是且佯僵而仆之其妻曰為子之遠行來之故為美
酒今妾奉而仆之其丈夫不知縛其妾而笞之故妾所
以笞者忠信也今臣為足下使於齊恐忠信不諭于左
右也臣聞之曰萬乘之主不制於人臣十乘之家不制
於衆人匹夫徒步之士不制於妻妾而又況於當時之
賢主乎臣請行矣願足下之無制于羣臣也

觸讐請長安君為質

戰國策

趙太后新用事秦急攻之趙氏求救於齊齊曰必以長安君為質兵乃出太后不肯大臣彊諫太后明謂左右有復言令長安君為質者老婦必唾其面左師觸讐願見太后盛氣而揖之入而徐趨至而自謝曰老臣病足曾不能疾走不得見久矣竊自怨恐太后玉體之有所郤也故願望見太后曰老婦恃輦而行曰日食飲得無衰乎曰恃鬻耳曰老臣今者殊不欲食乃自強步日三四里

少益嗜食和於身曰老婦不能太后之色少解左
師公曰老臣賤息舒祺最少不肖而臣衰竊愛憐之願
令補黑衣之數以衛王宮沒死以聞太后曰敬諾年幾
何矣對曰十五歲矣雖少願及未填溝壑而託之太后
曰丈夫亦愛憐其少子乎對曰甚於婦人太后曰婦人
異甚對曰老臣竊以為媼之愛燕后賢于長安君曰君
過矣不若長安君之甚左師公曰父母之愛子則為之
計深遠媼之送燕后也持其踵為之泣念悲其遠也亦

哀之矣已行非弗思也祭祀必祝之祝曰必勿使反豈非計久長有子孫相繼為王也哉太后曰然左師公曰今三世以前至于趙之為趙趙王之子孫侯者其繼有在者乎曰無有曰微獨趙諸侯有在者乎曰老婦不聞也此其近者禍及身遠者及其子孫豈人主之子孫則必不善哉位尊而亡功奉厚而無勞而挾重器多也今媼尊長安之位而封以膏腴之地多予之重器而不及今令有功於國一旦山陵崩長安君何以自託于趙老

臣以媼為長安君計短也故以為其愛不若燕后太后
曰諾恣君之所使之于是為長安君約車百乘質于齊
齊兵乃出于義聞之曰人主之子也骨肉之親也猶不
能恃無功之尊無勞之奉以守金玉之重也而況人臣
乎

楚王用羣臣計不予齊地

戰國策

楚襄王為太子之時質于齊懷王薨太子辭于齊王而
歸齊王隘之予我東地五百里乃歸子子不予我不得

歸太子曰臣有傳請退而問傳傳慎子曰獻之地所以為身也愛地不送死父不義臣故曰獻之便太子入致命齊王曰敬獻地五百里齊王歸楚太子太子歸即位為王齊使車五十乘來取東地於楚楚王告慎子曰齊使來求東地為之奈何慎子曰王明日朝羣臣皆令獻其計上柱國子良入見王曰寡人之得求反主墳墓復羣臣歸社稷也以東地五百里許齊今來求地為之奈何子良曰王不可不與也王身出玉聲許強萬乘之齊

而不與則不信後不可以約結諸侯請與而復攻之與之信攻之武臣故曰與之子良出昭常入見王曰齊使來求東地五百里為之奈何昭常曰不可與也萬乘者以地大為萬乘今去東地五百里是去戰國之半也有萬乘之號而無千乘之用也不可臣故曰勿與常請守之昭常出景鯉入見王曰齊使來求東地五百里為之奈何景鯉曰不可與也雖然楚不能獨守王身出玉聲許萬乘之強齊也而不與負不義於天下楚亦不能獨

守臣請西索救于秦景鯉出慎子入王以三大夫計告
慎子曰子良見寡人曰不可不與也與而復攻之常見
寡人曰不可與也常請守之鯉見寡人曰不可與也雖
然楚不能獨守也臣請索救于秦寡人誰用於三子之
計慎子對曰王皆用之王怫然作色曰何謂也慎子曰
臣請効其說而王且見其誠然也王發上柱國子良車
五十乘而北獻地五百里於齊發子良之明日遣昭常
為大司馬令往守東地遣昭常之明日遣景鯉車五十

乘西索救于秦王曰善乃遣子良北獻地於齊遣子良之明日立昭常為大司馬使守東地又遣景鯉西索救于秦子良至齊齊使人以甲受東地昭常應齊使曰我典主東地且與死生悉五尺至六十三十餘萬敝甲鈍兵願承下塵齊王謂子良曰大夫來獻地今常守之何如子良曰臣身受命敝邑之王是常矯也王攻之齊王大興兵攻東地伐昭常未涉疆秦以五十萬臨齊右壤曰夫隘楚太子弗出不仁又欲奪之東地五百里不義

其縮甲則可不然則願待戰齊王恐焉乃請子良南道
楚西使秦解齊患士卒不用東地復全

蘇子論留楚太子

戰國策

楚王死太子在齊質蘇子秦謂薛公曰君何不留楚太
子以市其下東國薛公曰不可我留太子郢中立王然
則是我抱空質而行不義于天下也蘇子秦曰不然郢
中立王君因謂其新王曰與我下東國吾為王殺太子
不然吾將與三國共立之然則下東國必可得也蘇子

秦之事可以請行可以令楚王亟入下東國可以益割
於楚可以忠太子而使楚益入地可以為楚王走太子
可以忠太子使之亟去可以惡蘇子秦於薛公可以為
蘇子秦請封于楚可以使人說薛公以善蘇子可以使
蘇子自解于薛公蘇子秦謂薛公曰臣聞謀泄者事亡
功計不決者名不成今君留楚太子者以市下東國也
非亟得下東國者則楚之計變變則是君抱空質而負
名于天下也薛公曰善為之奈何對曰臣請為君之楚

使亟入下東國之地楚得成則君無敗矣薛公曰善因遣之故曰可以請行也謂楚王曰齊欲奉太子而立之臣觀薛公之留太子者以市下東國也今王不亟入下東國則太子且倍王之割而使齊奉已楚王曰謹受命因獻下東國故曰可以使楚亟入地也謂薛公曰楚之勢可多割也薛公曰奈何請告太子其故使太子謁之君以忠太子使楚王聞之可以益入地故曰可以益割於楚謂太子曰齊奉太子而立之楚王請割地以留太

子齊少其地太子何不倍楚之割地而資齊齊必奉太子太子曰善倍楚之割而延齊楚王聞之恐益割地而獻之尚恐事不成故曰可以使楚益入地也謂楚王曰齊之所以多割地者挾太子也今已得地而求不止者以太子權王也故臣能去太子太子去齊無辭必不倍於王也王因馳強齊而為交齊辭必聽王然則是王去讐而得齊交也楚王大說曰請以國因故曰可以為楚王使太子亟去也謂太子曰夫剝楚者王也以空名市

者太子也齊未必信太子之言也而楚功見矣楚交成太子必危矣太子其圖之太子曰謹受命乃約車而暮去故曰可以使太子急去也蘇子秦使人請薛公曰夫勸留太子者蘇子秦也蘇子秦非誠以為君也且以便楚也蘇子秦恐君之知之故多割楚以滅跡也今勸太子去者又蘇子秦也而君弗知也臣竊為君疑之薛公大怒於蘇子秦故曰可以使人惡蘇子於薛公也奉王而代立楚太子者又蘇子秦也割地因約者又蘇子秦也忠

王而走太子者又蘇子秦也今人惡蘇子秦於薛公之側以其為齊薄而為楚厚也願王之知之楚王曰謹受命因封蘇子秦為武負君故曰可以為蘇子秦請封於楚也又使景鯉請薛公曰君之所以重於天下者以能得天下之士而有齊權也今蘇子秦天下之辨士也世與少有君因不善蘇子秦則是圍塞天下士而不利說途也夫不善君者且奉蘇子秦而于君之事殆矣今蘇子秦善於楚王而君不蚤親則是與楚為讐也故君不如

因而親之貴而重之是君有楚也薛公因善蘇子秦故
曰可以為蘇子秦說薛公以善蘇子秦

魯仲連責新垣衍

史記

趙孝成王時秦王使白起破趙長平之軍前後四十餘
萬秦兵遂東圍邯鄲趙王恐諸侯之救兵莫敢擊秦軍
魏安釐王使將軍晉鄙救趙畏秦止于蕩陰不進魏王
使客將軍新垣衍間入邯鄲因平原君謂趙王曰秦所
為急圍趙者前與齊湣王爭強為帝已而復歸帝今齊

湣王已益弱方今唯秦雄天下此非必貪邯鄲其意欲復求為帝趙誠發使尊秦昭王為帝秦必喜罷兵去平原君猶豫未有所決此時魯仲連適遊趙會秦圍趙聞魏將欲令趙尊秦為帝乃見平原君曰事將奈何平原君曰勝也何敢言事前亡四十萬之衆於外今又內圍邯鄲而不能去魏王使客將軍新垣衍令趙帝秦今其人在是勝也何敢言事魯仲連曰吾始以君為天下之賢公子也吾乃今然後知君非天下之賢公子也梁客

新垣衍安在吾請為君責而歸之平原君曰勝請為紹
介而見之于先生平原君遂見新垣衍曰東國有魯仲
連先生者今其人在此勝請為紹介交之于將軍新垣
衍曰吾聞魯仲連先生齊國之高士也衍人臣也使事
有職吾不願見魯仲連先生平原君曰勝既已泄之矣
新垣衍許諾魯連見新垣衍而無言新垣衍曰吾視居
此圍城之中者皆有求於平原君者也今吾觀先生之
玉貌非有求于平原君者也曷為久居此圍城之中而

不去魯仲連曰世以鮑焦為無從煩而死者皆非也衆人不知則為一身彼秦者棄禮義而上首功之國也權使其士虜使其民彼即肆然而為帝過而為政於天下則連有蹈東海而死耳吾不忍為之民也所為見將軍者欲以助趙也新垣衍曰先生助之將奈何魯連曰吾將使梁及燕助之齊楚則固助之矣新垣衍曰燕則吾請以從矣若乃梁者則吾乃梁人也先生惡能使梁助之魯連曰梁未睹秦稱帝之害故耳使梁睹秦稱帝之

害則必助趙矣新垣衍曰秦稱帝之害何如魯連曰昔者齊威王嘗為仁義矣率天下諸侯而朝周周貧且微諸侯莫朝而齊獨朝之居歲餘周烈王崩齊後往周怒赴于齊曰天崩地折天子下席東藩之臣田嬰齊後至則斲齊威王勃然怒曰叱嗟而母婢也卒為天下笑故生則朝周死則叱之誠不忍其求也彼天子固然其亡足怪新垣衍曰先生獨不見夫僕乎十人而從一人者寧力不勝而智不若邪畏之也魯仲連曰嗚呼梁之比於

秦若僕邪新垣衍曰然魯仲連曰吾將使秦王烹醢梁
王新垣衍快然不悅曰噫嘻亦太甚矣先生之言也先
生又惡能使秦王烹醢梁王魯仲連曰固也吾將言之
昔者九侯鄂侯文王紂之三公也九侯有子而好獻之
於紂紂以為惡醢九侯鄂侯爭之強辯之疾故脯鄂侯
文王聞之喟然而歎故拘之羑里之庫百日欲令之死
曷為與人俱稱王卒就脯醢之地齊湣王將之魯夷維
子為執策而從謂魯人曰子將何以待吾君魯人曰吾

將以十太牢待子之君夷維子曰子安取禮而來吾君
彼吾君者天子也天子巡狩諸侯辟舍納莞簟攝衽抱
杙視膳于堂下天子已食乃退而聽朝也魯人投其簠
不果納不得入于魯將之薛假途于鄒是時鄒君死湣
王欲入弔夷維子謂鄒之孤曰天子弔主人必將倍殯
棺設北面于南方然後天子南面弔也鄒之羣臣曰必
若此吾將伏劍而死故不敢入于鄒鄒魯之臣生則不
得事養死則不得賻禭然且欲行天子之禮于鄒魯鄒

魯之臣不果納今秦萬乘之國也梁亦萬乘之國也俱據萬乘之國各有稱王之名睹其一戰而勝欲從而帝之是使三晉之大臣不如鄒魯之僕妾也且秦無已而帝則且變易諸侯之大臣彼將奪其所不肖而與其所賢奪其所憎而與其所愛彼又將使其子女讒妾為諸侯妃姬處梁之宮梁王安得晏然而已乎而將軍又何以得故寵乎于是新垣衍起再拜謝曰始以先生為庸人吾乃今日知先生為天下之士也吾請出不敢復言

帝秦

蔡澤說應侯辭位

史記

蔡澤聞應侯任鄭安平王稽皆負重罪于秦應侯內慙
蔡澤乃西入秦將見昭王使人宣言以感怒應侯曰燕
客蔡澤天下雄俊弘辯智士也彼一見秦王秦王必困
君而奪君之位應侯聞曰五帝三代之事百家之說吾
既知之衆口之辨吾皆摧之是惡能困我而奪我位乎
使人召蔡澤蔡澤入則揖應侯應侯固不快及見之又

倨應侯因讓之曰子常宣言欲代我相秦寧有之乎對
曰然應侯曰請聞其說蔡澤曰吁君何見之晚也夫四
時之序成功者去夫人生百體堅強手足便利耳目聰
明而心聖智豈非士之願與應侯曰然蔡澤曰質仁秉
義行道施德得志于天下天下懷樂敬愛而尊慕之皆
願以為君王豈不辯智之期與應侯曰然蔡澤復曰富
貴顯榮成理萬物使各得其所性命壽長終其天年而
不夭傷天下繼其統守其業傳之亡窮名實純粹澤流

千里世世稱之而無絕與天地終始豈道德之符而聖
人所謂吉祥善事者與應侯曰然蔡澤曰若夫秦之商
君楚之吳起越之大夫種其卒然亦可願與應侯知蔡
澤之欲困已以說復謬曰何為不可夫公孫鞅之事孝
公極身而無貳慮盡公而不顧私設刀鋸以禁奸邪信
賞罰以致治披腹心示情素蒙怨咎欺舊友奪魏公子
印安秦社稷利百姓卒為秦禽將破敵攘地千里吳起
之事悼王也使私不得害公讒不得蔽忠言不取苟合

行不取苟容不為危易行行義不辟難然為霸王彊國
不辭禍凶大夫種之事越王也主雖困辱悉忠而不解
主雖絕亡盡能而弗離成功而弗矜貴富而不驕怠若
此三子者固義之至也忠之節也是故君子以義死難
視死如歸生而辱不如死而榮士固有殺身以成名唯
義之所在雖死無所恨何為不可哉蔡澤曰主聖臣賢
天下之盛福也君明臣直國之福也父慈子孝夫信妻
貞家之福也故比干忠而不能存殷子胥智而不能完

吳申生孝而晉國亂是皆有忠臣孝子而國家滅亂者何也無明君賢父以聽之故天下以其君父為僇辱而憐其臣子今商君吳起大夫種之為人臣是也其君非也故世稱三子致功而不見德豈慕不遇世死乎夫待死而後可以立忠成名是微子不足仁孔子不足聖管仲不足大也夫人之立功豈不期于成全邪身與名俱全者上也名可法而身死者其次也名在僇辱而身全者下也于是應侯稱善蔡澤少得間因曰夫商君吳起

大夫種其為人臣盡忠致功則可願矣閔天事文王周公輔成王也豈不亦忠聖乎以君臣論之商君吳起大夫種其可願孰與閔天周公旦哉應侯曰商君吳起大夫種弗若也蔡澤曰然則君之主慈仁任忠惇厚舊故其賢智與有道之士為膠漆義不倍功臣孰與秦孝公楚悼王越王乎應侯曰未知何如也蔡澤曰今主親忠臣不過秦孝公楚悼王越王君之設智能為主安危修政治亂彊兵批患折難廣地植穀富國足家彊主尊社

稷顯宗廟天下莫敢欺犯其主主之威蓋震海內功彰
萬里之外聲名光輝傳于千世君孰與商君吳起大夫
種應侯曰不若蔡澤曰今主之親忠臣不忘舊故不若
孝公悼王勾踐而君之功績愛信親幸又不若商君吳
起大夫種然而君之祿位貴盛私家之富過於三子而
身不退者恐患之甚于三子竊為君危之語曰日中則
移月滿則虧物盛則衰天地之常數也進退盈縮與時
變化聖人之常道也故國有道則仕國亡道則隱聖人

曰飛龍在天利見大人不義而富且貴於我如浮雲今
君之怨已讐而德已報意欲至矣而無變計竊為君不
取也且夫翠鵠犀象其處勢非不遠死也而所以死者
惑於餌也蘇秦智伯之智非不足以辟辱遠死也而所
以死者惑于貪利不止也是以聖人制禮節欲取於民
有度使之以時用之有止故志不溢行不驕常與道俱
而不失故天下承而不絕昔者齊桓公九合諸侯一匡
天下至于葵丘之會有驕矜之志畔者九國吳王夫差

兵無敵於天下勇彊以輕諸侯陵齊晉故遂以殺身亡
國夏育太史激叱呼駭三軍然而身死於庸夫此皆乘
至盛而不返道理不居卑退處儉約之患也夫商君為
秦孝公明法令禁奸本尊爵必賞有罪必罰平權衡正
度量調輕重決裂阡陌以靜生民之業而一其俗勸民
耕農利土一室無二事力田穡積習戰陳之事是以兵
動而地廣兵休而國富故秦無敵於天下立威諸侯成
秦國之業功已成矣而遂以車裂楚地方數千里持戟

百萬白起率數萬之師以與楚戰一戰舉鄢郢以燒夷陵再戰南并蜀漢又越韓魏而攻彊趙北坑馬服誅屠四十餘萬之衆盡之於長平之下流血成川沸聲若雷遂入圍邯鄲使秦有帝業楚趙天下之彊國而秦之仇敵也自是之後楚趙皆懾伏不敢攻秦者白起之勢也身所服者七十餘城功已成矣而遂賜劍死于杜郵吳起為楚悼王立法卑減大臣之威重罷無能廢無用損不急之官塞私門之請一楚國之俗禁游客之民精耕

戰之士南收揚越北并陳蔡破橫散從使馳說之士無
所開其口禁朋黨以厲百姓定楚國之政兵震天下威
服諸侯功已成矣而卒枝解大夫種為越王深謀遠計
免會稽之危以亡為存因辱為榮墾草入邑辟地殖穀
率四方之士專上下之力輔勾踐之賢報夫差之讐卒
擒勁吳令越成霸功已彰而信矣勾踐終負而殺之此
四子者功成不去禍至於此此所謂信而不能誦往而
不能返者也范蠡知之超然辟世長為陶朱公君獨不

觀夫博者乎或欲大投或欲分功此皆君之所明知也
今君相秦計不下席謀不出廊廟坐制諸侯利施三川
以實宜陽決羊腸之險塞太行之道又斬范中行之塗
六國不得合從棧道千里通於蜀漢使天下皆畏秦秦
之欲得矣君之功極矣此亦秦之分功之時也如是而
不退則商君白公吳起大夫種是也吾聞之鑒於水者
見面之容鑒於人者知吉與凶書曰成功之下不可久
處四子之禍君何居焉君何不以此時歸相印讓賢者

而授之退而巖居川觀必有伯夷之廉長為應侯世世稱孤而有許由延陵季子之讓喬松之壽孰與以禍終哉即君何居焉忍不能自離疑不能自決必有四子之禍矣易曰亢龍有悔此言上而不能下信而不能誦往而不能自反者也願君熟計之應侯曰善吾聞欲而不知止失其所以欲有而不知足失其所以有先生幸教
睢敬受命

文編卷二十一

欽定四庫全書

文編卷二十二

明 唐順之 編

秋水

莊子

秋水時至百川灌河涇流之大兩涘渚崖之間不辨牛馬於是焉河伯欣然自喜以天下之美為盡在已順流而東行至於北海東面而視不見水端於是焉河伯始旋其面目望洋向若而歎曰野語有之曰聞道百以為

莫已若者我之謂也且夫我嘗聞少仲尼之聞而輕伯夷之義者始吾弗信今我睹子之難窮也吾非至於子之門則殆矣吾長見笑於大方之家北海若曰井鼃不可以語於海者拘於虛也夏蟲不可以語於冰者篤於時也曲士不可以語於道者束於教也今爾出於崖涘觀於大海乃知爾醜爾將可與語大理矣天下之水莫大於海萬川歸之不知何時止而不盈尾閭泄之不知何時已而不虛春秋不變水旱不知此其過江河之流

不可為量數而吾未嘗以此自多者自以比形於天地而受氣於陰陽吾在於天地之間猶小石小木之在大山也方存乎見少又奚以自多計四海之在天地之間也不似壘空之在大澤乎計中國之在海內不似稊米之在太倉乎號物之數謂之萬人處一焉人卒九州穀食之所生舟車之所通人處一焉此其比萬物也不似毫末之在於馬體乎五帝之所連三王之所爭仁人之所憂任士之所勞盡此矣伯夷辭之以為名仲尼語之

以為博此其自多也不似爾向之自多於水乎河伯曰
然則吾大天地而小毫末可乎北海若曰否夫物量無
窮時無止分無常終始無故是故大知觀於遠近故小
而不寡大而不多知量無窮證鄉今故故遙而不悶掇
而不跂知時無止察乎盈虛故得而不喜失而不憂知
分之無常也明乎坦塗故生而不說死而不禍知終始
之不可故也計人之所知不若其所不知其生之時不
若未生之時以其至小求窮其至大之域是故迷亂而

不能自得也由此觀之又何以知毫末之足以定至細之倪又何以知天地之足以窮至大之域河伯曰世之議者皆曰至精無形至大不可圍是信情乎北海若曰夫自細視大者不盡自大視細者不明夫精小之微也埒大之殷也故異便此勢之有也夫精粗者期於有形者也無形者數之所不能分也不可圍者數之所不能窮也可以言論者物之粗也可以意致者物之精也言之所不能論意之所不能察致者不期精粗焉是故大

人之行不出乎害人不多仁恩動不為利不賤門隸貨財弗爭不多辭讓事焉不借人不多食乎力不賤貪汙行殊乎俗不多辟異為在從眾不賤佞諂世之爵祿不足以為勸戮恥不足以為辱知是非之不可為分細大之不可為俛間曰道人不間至德不得大人無已約分之至也河伯曰若物之外若物之內惡至而俛貴賤惡至而俛小大北海若曰以道觀之物無貴賤以物觀之自貴而相賤以俗觀之貴賤不在已以差觀之因其所

大而大之則萬物莫不大因其所小而小之則萬物莫不小知天地之為稊米也知毫末之為丘山也則差數覩矣以功觀之因其所有而有之則萬物莫不有因其所無而無之則萬物莫不無知東西之相反而不可以相無則功分定矣以趣觀之因其所然而然之則萬物莫不然因其所非而非之則萬物莫不非知堯桀之自然而相非則趣操覩矣昔者堯舜讓而帝之噲讓而絕湯武爭而王白公爭而滅由此觀之爭讓之禮堯桀之

行貴賤有時未可以為常也梁麗可以衝城而不可以
窒穴言殊器也騏驎驪騮一日而馳千里捕鼠不如狸
狌言殊技也鵩鵩夜撮蚤察毫末晝出瞋目而不見丘
山言殊性也故曰蓋師是而無非師治而無亂乎是未
明天地之理萬物之情者也是猶師天而無地師陰而
無陽其不可行明矣然且語而不舍非愚則誣也帝王
殊禪三代殊繼差其時逆其俗者謂之篡夫當其時順
其俗者謂之義之徒默默乎河伯女惡知貴賤之門小

大之家河伯曰然則我何為乎何不為乎吾辭受趣舍
吾終奈何北海若曰以道觀之何貴何賤是謂反衍無
拘而志與道大蹇何少何多是謂謝施無一而行與道
參差嚴乎若國之有君其無私德繇繇乎若祭之有社
其無私福泛泛乎其若四方之無窮其無所畛域兼懷
萬物其孰承翼是謂無方萬物一齊孰短孰長道無終
始物有死生不恃其成一虛一滿不位乎其形年不可
舉時不可止消息盈虛終則有始是所以語大義之方

論萬物之理也物之生也若驟若馳無動而不變無時
而不移何為乎何不為乎夫固將自化河伯曰然則何
貴於道耶北海若曰知道者必達於理達於理者必明
於權明於權者不以物害己至德者火弗能熱水弗能
溺寒暑弗能害禽獸弗能賊非謂其薄之也言察乎安
危寧於禍福謹於去就莫之能害也故曰天在內人在
外德在乎天知天人之行本乎天位乎得蹢躅而屈伸
反要而語極曰何謂天何謂人北海若曰牛馬四足是

謂天絡馬首穿牛鼻是謂人故曰無以人滅天無以故
滅命無以得殉名謹守而勿失是謂反其真夔憐蛇蛇
憐蛇蛇憐風風憐目目憐心夔謂蛇曰吾以一足踰蹠
而行予無如矣今子之使萬足獨柰何蛇曰不然子不
見夫唾者乎噴則大者如珠小者如霧雜而下者不可
勝數也今予動吾天機而不知其所以然蛇謂蛇曰吾
以衆足行而不及子之無足何也蛇曰夫天機之所動
何可易邪吾安用足哉蛇謂風曰予動吾脊脅而行則

有似也今子蓬蓬然起於北海蓬蓬然入於南海而似無有何也風曰然予蓬蓬然起於北海而入於南海也然而指我則勝我鱗我亦勝我雖然夫折大木蜚大屋者唯我能也故以衆小不勝為大勝也為大勝者唯聖人能之孔子遊於匡宋人圍之數匝而絃歌不輟子路入見曰何夫子之娛也孔子曰來吾語女我諱窮久矣而不免命也求通久矣而不得時也當堯舜而天下無窮人非知得也當桀紂而天下無通人非知失也時勢

適然夫水行不避蛟龍者漁父之勇也陸行不避兕虎者獵夫之勇也白刃交於前視死若生者烈士之勇也知窮之有命知通之有時臨大難而不懼者聖人之勇也由處矣吾命有所制矣無幾何將甲者進辭曰以為陽虎也故圍之今非也請辭而退公孫龍問於魏牟曰龍少學先王之道長而明仁義之行合同異離堅白然不然可不可困百家之知窮衆口之辨吾自以為至達已今吾聞莊子之言茫焉異之不知論之不及與知之

弗若與今吾無所開吾喙敢問其方公子年隱機太息
仰天而笑曰子獨不聞夫埳井之鼃乎謂東海之鱉曰
吾樂與吾跳梁乎井幹之上入休乎缺甃之崖赴水則
接掖持頤蹶泥則沒足滅跗還軒蟹與科斗莫吾能若
也且夫擅一壑之水而跨時埳井之樂此亦至矣夫子
奚不時來入觀乎東海之鱉左足未入而右膝已紮矣
於是逡巡而却告之海曰夫千里之遠不足以舉其大
千仞之高不足以極其深禹之時十年九潦而水弗為

加盆湯之時八年七旱而崖不為加損夫不為頃久推移不以多少進退者此亦東海之大樂也於是埴井之鼃聞之適適然驚規規然自失也且夫知不知是非之竟而猶欲觀於莊子之言是猶使蚩負山商虬馳河也必不勝任矣且夫知不知論極妙之言而自適一時之利者是非埴井之鼃與且彼方趾黃泉而登大皇無南無北爽然四解淪於不測無東無西始於玄冥反於大通子乃規規然而求之以察索之以辨是直用管闕天

用錐指地也不亦小乎子往矣且子獨不聞夫壽陵餘
子之學行於邯鄲與未得國能又失其故行矣直匍匐
而歸耳今子不去將忘子之故失子之業公孫龍口呿
而不合舌舉而不下乃逸而走莊子釣於濮水楚王使
大夫二人往先焉曰願以境內累矣莊子持竿不顧曰
吾聞楚有神龜死已三千歲矣王巾笥而藏之廟堂之
上此龜者寧其死為留骨而貴乎寧其生而曳尾於塗
中乎二大夫曰寧生而曳尾塗中莊子曰往矣吾將曳

尾於塗中惠子相梁莊子往見之或謂惠子曰莊子來
欲代子相於是惠子恐搜於國中三日三夜莊子往見
之曰南方有鳥其名鵩鵩子知之乎夫鵩鵩發於南海
而飛於北海非梧桐不止非練實不食非醴泉不飲於
是鵩得腐鼠鵩雖過之仰而視之曰嚇今子欲以子之
梁國而嚇我耶莊子與惠子遊於濠梁之上莊子曰儵
魚出游從容是魚樂也惠子曰子非魚安知魚之樂莊
子曰子非我安知我不知魚之樂惠子曰我非子固不

知子矣子固非魚也子之不知魚之樂全矣莊子曰請
循其本子曰女安知魚樂云者既已知吾知之而問我
我知之濠上也

難一

韓非子

晉文公將與楚人戰召舅犯問之曰吾將與楚人戰彼
衆我寡為之柰何舅犯對曰臣聞之繁禮君子不厭忠
信戰陣之間不厭詐偽君其詐之而已矣文公辭舅犯
因召雍季而問之曰我將與楚人戰彼衆我寡為之柰

何雍季對曰焚林而田偷取多獸後必無獸以詐過民偷取一時後必無復文公曰善辭雍季以舅犯之謀與楚人戰以敗之歸而行爵先雍季而後舅犯羣臣曰城濮之事舅犯謀也夫用其言而後其身可乎文公曰此非君所知也夫舅犯言一時之權也雍季言萬世之利也仲尼聞之曰文公之霸也宜哉既知一時之權又知萬世之利或曰雍季之對不當文公之問凡對問者有因因小大緩急而對也所問高大而對以卑狹則明主

弗受也。今文公問以少遇衆而對曰：後必無復，此非所以應也。且文公不知一時之權，又不知萬世之利。戰而勝，則國安而身定；兵強而威立，雖有後復，莫大於此。萬世之利，奚患不至？戰而不勝，則國亡兵弱，身死名息。拔拂今日之死，不及安暇待萬世之利。待萬世之利，在今日之勝。今日之勝，在詐於敵。詐敵萬世之利，已故曰：雍季之對不當。文公之問，且文公又不知舅犯之言。舅犯所謂不厭詐偽者，不謂詐其民，謂詐其敵也。敵者所伐，

之國也後雖無復何傷哉文公之所以先雍季者以其功耶則所以勝楚破軍者舅犯之謀也以其善言耶則雍季乃道其後之無復也此未有善言也舅犯則以兼之矣舅犯曰繁禮君子不厭忠信者忠所以愛其下也信所以不欺其民也夫既以愛而不欺矣言孰善於此然必曰出於詐偽者軍旅之計也舅犯前有善言後有戰勝故舅犯有二功而後論雍季無一焉而先賞文公之霸也不亦宜乎仲尼不知善賞也管仲有病桓公往

問之曰仲父病不幸卒於大命將奚以告寡人管仲曰
微君言臣故將謁之願君去豎刁除易牙豎其首子而
方易牙為君主味君主惟人肉未嘗易牙豎其首子而
進之夫人情莫不愛其子今弗愛其子安能愛君君妬
而好內豎刁自宮以治內人情莫不愛其身身且不愛
安能愛君開方事君十五年齊衛之間不容數日行棄
其母久官不歸其母不愛安能愛君臣聞之矜偽不長
蓋虛不久願君去此三子者也管仲卒死而桓公弗行

及桓公死蟲出尸不葬或曰管仲所以見告桓公者非有度者之言也所以去豎刁易牙者以不愛其身適君之欲也曰不愛其身安能愛君然則臣有盡死力以為其主者管仲將不用也曰不愛其死安能愛君是君去忠臣也且以不愛其身度其不愛其君是將以管仲之不能死公子糾度其不死桓公也是管仲亦在所去之域矣明主之道不然設民所欲以求其功乃為爵祿以勸之設民所惡以禁其奸故為刑罰以威之慶賞信而

刑罰必故君舉功於臣而姦不用於上雖有豎刁其柰君何且臣盡死力以與君市君垂爵祿以與臣市君臣之際非父子之親也計數之所出也君有道則臣盡力而姦不生無道則臣上塞主明而下成私管仲非明此度數於桓公也使去豎刁一豎刁又至非絕姦之道也且桓公所以身死蟲流尸不葬者是臣重也臣重之實擅主也有擅主之臣則君令不下究臣情不上通一人之力能隔君臣之間使善敗不聞禍福不通故有不葬

之患也明主之道一人不兼官一官不兼事卑賤不待尊貴而進大臣不因左右而見百官修通羣臣輻湊有賞者君見其功有罰者君知其罪見知不悖於前賞罰不蔽於後安有不葬之患管仲非明此言於桓公也使去三子故曰管仲無度矣

靡笄之役韓獻子將斬人郤獻子聞之駕往救之比至則已斬之矣郤子因曰胡不以殉其僕曰曩不將救之乎郤子曰吾敢不分謗乎或曰郤子言不可不察也非

分謗也韓子之所斬也若罪人則不可救救罪人法之
所以敗也法敗則國亂若非罪人則勸之以殉勸之以
殉是重不辜也重不辜民所以起怨者也民怨則國危
郄子之言非危則亂不可不察也且韓子之所斬若罪
人郄子奚分焉斬若非罪人則已斬之矣而郄子乃至
是韓子之謗已成而郄子且後至也夫郄子曰以殉不
足以分斬人之謗而又生殉之謗是何言分謗也昔者
紂為炮烙崇侯惡來又曰斬涉者之脛也奚分於紂之

謗且民之望於上也甚矣韓子弗得且望郄子得之也
今郄子俱弗得則民絕望於上矣故曰郄子之言非分
謗也益謗也且郄子之往救罪也以韓子為非也不道
其所以為非而勸之以殉是使韓子不知其過也夫下
使民望絕於上又使韓子不知其失吾未得郄子之所
以分謗者也

韓宣王問於繆留吾欲兩用公仲公叔其可乎繆留對
曰昔魏兩用樓翟而亡西河楚兩用昭景而亡鄢郢今

君兩用公仲公叔此必將爭事而外市則國必憂矣或
曰昔者齊桓公兩用管仲鮑叔成湯兩用伊尹仲虺夫
兩用臣者國之憂則是桓公不霸成湯不王也湣王一
用淖齒而身死乎東廟主父一用李兌減食而死主有
術兩用不為患無術兩用則爭爭事而外市一則專制
而劫弑今留無術以規上使其主去兩用一是不有西
河鄢郢之憂則必有身死減食之患是膠留未有善以
知言也

難二 韓非子

景公過晏子曰子宮小近市請徙子家豫章之圃晏子
再拜而辭曰且嬰家貧待市食而朝暮趨之不可以遠
景公笑曰子家習市識貴賤乎是時景公繫於刑晏子
對曰踊貴而屨賤景公曰何故對曰刑多也景公造然
變色曰寡人其暴乎於是損刑五或曰晏子之貴踊非
其誠也欲便辭以止多刑也此不察治之患也夫刑當
無多不當無少無以不當聞而以太多說無術之患也

敗軍之誅以千百數猶不止即治亂之刑如恐不勝而姦尚不盡今晏子不察其當否而以太多為說不亦妄乎夫惜草茅者耗禾穗惠盜賊者傷良民今緩刑罰行寬惠是利姦邪而害善人也此非所以為治也

齊桓公之時晉客至有司請禮桓公曰告仲父者三而優笑曰易哉為君一曰仲父二曰仲父桓公曰吾聞君人者勞於索人佚於使人吾得仲父已難矣已得仲父之後何為不易乎哉或曰桓公之所應優非君人者之

言也桓公以君人為勞於索人何索人為勞哉伊尹自以為宰干湯百里奚自以為媵干穆公媵所辱也宰所羞也蒙羞辱而接君上賢者之憂世急也然則君人者無逆賢而已矣索賢不為人主難且官職所以任賢也爵祿所以賞功也設官職陳爵祿而士自至君人者奚其勞哉使人又非所佚也人主雖使人必以度量準之以刑名參之以事過於法則行不過於法則止功當其言則賞不當則誅以刑名收臣以度量準下此不可釋

也君人者焉佚哉索人不勞使人不佚而桓公曰勞於
索人佚於使人者不然且桓公索管仲又不難管仲不
死其君而歸桓公鮑叔輕官讓能而任之桓公得管仲
又不難明矣已得管仲之後奚遽易哉管仲非周公旦
周公旦假為天子七年成王壯授之以政非為天下計
也為其職也夫不奪幼子而行天下者必不背死君而
事其讐倍死君而事其讐者必不難奪幼子而行天下
不難奪幼子而行天下者必不難奪其君國矣管仲公

子糾之臣也謀殺桓公而不能其君死而臣桓公管仲之取舍非周公旦未可知也若使管仲大賢也且為湯武湯武桀紂之臣也桀紂作亂湯武奪之今桓公以易居其上是以桀紂之行居湯武之上桓公危矣若使管仲不肖人也且為田常田常簡公之臣也而弑其君今桓公以易居其上是以簡公之易居田常之上也桓公又危矣管仲非周公旦亦明矣然為湯武與田常未可知也為湯武有桀紂之危為田常有簡公之亂也已得

仲父之後桓公奚遽易哉若使桓公之任管仲必知不欺已也是知不欺主之臣也然雖不知不欺主之臣令桓公以任管仲之專任豎刁易牙蟲流出尸而不葬桓公不知臣欺主與不欺主已明矣而任臣如彼其專也故曰桓公闇主

孤憤

韓非子

智術之士必遠見而明察不明察不能燭私能法之士必強毅而勁直不勁直不能矯姦人臣循令而從事按

法而治官非謂重人也重人也者無令而擅為虧法以
利私耗國以便家力能得其君此所謂重人也智術之
士明察聽用且燭重人之陰情能法之士勁直聽用且
矯重人之姦行故智術能法之士用則貴重之臣必在
繩之外矣是智法之士與當塗之人不可兩存之仇也
當塗之人擅事要則外內為之用矣是以諸侯不因則
事不應故敵國為之訟百官不因則業不進故羣臣為
之用郎中不因則不得近主故左右為之匿學士不因

則養祿薄禮卑故學士為之談也此四助者邪臣之所
以自飾也重人不能忠主而進其仇人主不能越四助
而燭察其臣故人主愈弊而大臣愈重凡當塗者之於
主也希不信愛也又且習故若夫即主心同乎好惡固
其所自進也官爵貴重朋黨又衆而一國為之訟則法
術之士欲干上者非有所信愛之親習故之澤也又將
以法術之言矯人主阿辟之心是與人主相反也處勢
卑賤無黨孤特夫以踈遠與近愛信爭其數不勝也以

新旅與習故爭其數不勝也以反主意與同好爭其數
不勝也以輕賤與貴重爭其數不勝也以一口與一國
爭其數不勝也法術之士操五不勝之勢以歲數而又
不得見當塗之人乘五勝之資而旦暮獨說於前故法
術之士奚道得進而人主奚時得悟乎故資必不勝而
勢不兩存法術之士焉得不危其可以罪過誣者公法
而誅之其不可被以罪過者以私劍而窮之是明法術
而逆主上者不僂於吏誅必死於私劍矣朋黨比周以

蔽主言曲以便私者必信於重人矣故其可以功伐借者以官爵貴之其不可借以美名者以外權重之是以蔽主上而趨於私門者不顯於官爵必重於外權矣今人主不合參驗而行誅不待見功而爵祿故法術之士安能蒙死亡而進其說姦邪之臣安肯乘利而退其身故主上愈卑私門益尊夫越雖國富兵強中國之主皆知無益於已也曰非吾所得制也今有國者雖地廣人衆然而人主壅蔽大臣專權是國為越也知不類越而

不知不類其國不察其類者也人主所以謂齊亡者非地與城亡也呂氏弗制而田氏用之也所以謂晉亡者亦非地與城亡也姬氏弗制而六卿專之也今大臣執柄獨斷而上弗知收是人主不明也與死人同病者不可生也與亡國同事者不可存也今襲跡於齊晉欲國安存不可得也凡法術之難行也不獨萬乘千乘亦然人主之左右不必智也人主於人有所智而聽之因與左右論其言是與愚人論智也人主之左右不必賢也

人主於人有所賢而禮之因與左右論其行是與不肖
論賢也智者決策於愚人賢士程行於不肖則賢智之
士羞而人主之論悖矣人臣之欲得官者其修士且以
精潔固身其智士且以治辨進業其修士不能以貨賂
事人恃其精潔而更不能以枉法為治則修智之士不
事左右不聽請謁矣人主之左右行非伯夷也求索不
得貨賂不至則精辨之功息而毀誣之言起矣治亂之
功制於近習精潔之行決於毀譽則修智之吏廢人主

之明塞矣不以功伐決智行不以參伍審罪過而聽左右近習之言則無能之士在廷而愚汙之吏處官矣萬乘之患大臣太重千乘之患左右太信此人主之所公患也且人臣有大罪人主有大失臣主之利與相異者也何以明之哉曰主利在有能者任官臣利在無能而得事主利在有勞而爵祿臣利在無功而富貴主利在豪傑使能臣利在朋黨用私是以國地削而私家富主上卑而大臣重故主失勢而臣得國主更稱蕃臣而相

室剖符此人臣之所以譎主便私也故當世之重臣主
變勢而得固寵者十無二三是其故何也人臣之罪大
也臣有大罪者其行欺主也其罪當死亡也智士者遠
見而畏於死亡必不從重人矣賢士者修廉介羞與姦
臣欺其主必不從重人矣是當塗者之徒屬非愚而不
知患者必汙而不避姦者也大臣挾愚汙之人上與之
欺主下與之收利侵漁朋黨比周相與一口惑主敗法
以亂士民使國危削主上勞辱此大罪也臣有大罪而

主弗禁此大失也使其主有大失於上臣有大罪於下索國之不亡者不可得也

正論

荀子

世俗之為說者曰主道利周是不然主者民之唱也上者下之儀也彼將聽唱而應視儀而動唱嘿則民無應也儀隱則下無動也不應不動則上下無以相有也若是則與無上同也不祥莫大焉故上者下之本也上宣明則下治辨矣上端誠則下愿慤矣上公正則下易直

矣治辨則易一愿慤則易使易直則易知易一則彊易
使則功易知則明是治之所由生也上周密則下疑眩
矣上幽險則下漸詐矣上偏曲則下比周矣疑眩則難
一漸詐則難使比周則難知難一則不彊難使則不功
難知則不明是亂之所由作也故主道利明不利幽利
宜不利周故主道明則下安主道幽則下危故下安則
貴上下危則賤上故上易知則下親上矣上難知則下
畏上矣下親上則上安下畏上則上危故主道莫惡乎

難知莫危乎使下畏已傳曰惡之者衆則危書曰克明
明德詩曰明明在下故先王明之豈特眩之耳哉世俗
之為說者曰桀紂有天下湯武篡而奪之是不然以桀
紂為常有天下之籍則然親有天下之籍則不然天下
謂在桀紂則不然古者天子千官諸侯百官以是千官
也令行於諸夏之國謂之王以是百官也令行於境內
國雖不安不至於廢易遂亡謂之君聖王之子也有天
下之後也勢籍之所在也天下之宗室也然而不材不

中內則百姓疾之外則諸侯叛之近者境內不一遙者諸侯不聽令不行於境內甚者諸侯侵削之攻伐之若是則雖未亡吾謂之無天下矣聖王沒有勢藉者罷不足以縣天下天下無君諸侯有能德明威積海內之民莫不願得以為君師然而暴國獨侈安能誅之必不傷害無罪之民誅暴國之君若誅獨夫若是則可謂能用天下矣能用天下之謂王湯武非取天下也修其道行其義興天下之同利除天下之同害而天下歸之也桀

紂非去天下也反禹湯之德亂禮義之分禽獸之行積其凶全其惡而天下去之也天下歸之之謂王天下去之之謂亡故桀紂無天下而湯武不弑君由此効之也湯武者民之父母也桀紂者民之怨賊也今世俗之為說者以桀紂為君而以湯武為弑然則是誅民之父母而師民之怨賊也不祥莫大焉以天下合為君則天下未嘗合於桀紂也然則以湯武為弑則天下未嘗有說也直隲之耳故天子唯其人天下者至重也非至彊莫

之能任至大也非至辨莫之能分至衆也非至明莫之
能知此三至者非聖人莫之能盡故非聖人莫之能王
聖人備道全美者也是縣天下之權稱也桀紂者其知
慮至險也其志意至闇也其行之為至亂也親者疏之
賢者賤之生民怨之禹湯之後也而不得一人之與創
比干囚箕子身死國亡為天下之大戮後世之言惡者
必稽焉是不容妻子之數也故至賢疇四海湯武是也
至罷不容妻子桀紂是也今世俗之為說者以桀紂為

有天下而臣湯武豈不過甚矣哉譬之是猶偃巫跂匠
大自以為有知也故可以有奪人國不可有以奪人天
下可以有竊國不可以有竊天下也可以奪之者可以
有國而不可以有天下竊國可以得國而不可以得天下
是何也曰國小具也可以小人有也可以小道得也可
以小力持也天下者大具也不可以小人有也不可以
小道得也不可以小力持也國者小人可以有之然而
未必不亡也天下者至大也非聖人莫之能有也世俗

之為說者曰治古無肉刑而有象刑墨黥劓髡共艾畢
非紂屢殺赭衣而不純治古如是是不然以為治耶則
人固莫觸罪非獨不用肉刑亦不用象刑矣以為人或
觸罪矣而直輕其刑然則是殺人者不死傷人者不刑
也罪至重而刑至輕庸人不知惡也亂莫大焉凡刑人
之本禁暴惡惡且徵其未也殺人者不死而傷人者不
刑是謂惠暴而寬賊也非惡惡也故象刑殆非生於治
古並起於亂今也治古不然凡爵列官職賞慶刑罰皆

報也以類相從者也一物失稱亂之端也夫德不稱位能不稱官賞不當功罰不當罪不祥莫大焉昔者武王伐有商誅紂斷其首懸之赤旆夫征暴誅悍治之盛也殺人者死傷人者刑是百王之所同未有知其所由來者也刑稱罪則治不稱罪則亂故治則刑重亂則刑輕犯治之罪固重犯亂之罪固輕書曰刑罰世輕世重此之謂也世俗之為說者曰湯武不能禁令是何也曰楚越不受制是不然湯武者至天下之善禁令者也湯居

亳武王居鄆皆百里之地也天下為一諸侯為臣通達之屬莫不振動從服以化順之曷為楚越獨不受制也彼王者之制也視形勢而制械用稱遠邇而等貢獻豈必齊哉故魯人以櫜衛人用柯齊人用一革土地形制不同者械用備飾不可不異也故諸夏之國同服同儀蠻夷戎狄之國同服不同制封內甸服封外侯服侯衛賓服蠻夷要服戎狄荒服甸服者祭侯服者祀賓服者享要服者貢荒服者終王日祭月祀時享歲貢終王夫

是之謂視形勢而制械用稱遠近而等貢獻是王者之至也彼楚越者且時享歲貢終王之屬也必齊之日祭月祀之屬然後曰受制耶是規磨之說也溝中之瘠也則未足與及王者之制也語曰淺不足與測深愚不足以謀知坎井之鼃不可與語東海之樂此之謂也世俗之為說者曰堯舜擅讓是不然天子者勢位至尊無敵於天下夫有誰與讓矣道德純備智慧甚明南面而聽天下生民之屬莫不振動從服以化順之天下無隱士

無遺善同焉者是也異焉者非也夫有惡擅天下矣曰死而擅之是又不然聖王在上圖德而定次量能而授官皆民載其事而各得其宜不能以義制利不能以偽飾性則兼以為民聖王以沒天下無聖則固莫足以擅天下矣天下有聖而在後者則天下不離朝不易位國不更制天下厭焉與鄉無以異也以堯繼堯夫又何變之有矣聖不在後子而在三公則天下如歸猶復而振之也天下厭然與鄉無以異也以堯易堯夫又何變之

有矣唯其徙朝改制為難故天子生則天下一隆致順而治論德而定次死則能任天下者必有之矣夫禮義之分盡矣擅讓惡用矣哉曰老衰而擅是又不然血氣筋力則有衰若夫智慮取舍則無衰曰老者不堪其勞而休也是又畏事者之議也天子者勢至重而形至佚心至愉而志無所詘形不為勞尊無上矣衣被則服五采雜間色重文繡加飾之以珠玉食飲則重太牢而備珍怪期臭味曼而饋代畢而食雍而徹乎五祀執薦者

百人待西房居則設張容負依而坐諸侯趨走乎堂下
出戶而巫覡有事出門而宗祝有事乘大路越席以養
安側載畢芷以養鼻前有錯衡以養目和鸞之聲步中
武象騶中韶護以養耳三公奉軔持納諸侯持輪挾輿
先馬大侯編後大夫次之小侯元士次之庶士介而坐
道庶人隱竄莫敢望視居如大神動如天帝持老養衰
猶有善於是者與不老者休也休猶有安樂恬愉如是
乎故曰諸侯有老天子無老有擅國無擅天下古今一

也夫曰堯舜擅讓是虛言也是淺者之傳陋者之說也
不知逆順之理小大至不至之變也未可與及天下之
大理者也世俗之為說者曰堯舜不能教化是何也曰
朱象不化是不然也堯舜至天下之善教化者也南面
而聽天下生民之屬莫不振動從服以化順之然而朱
象獨不化是非堯舜之過朱象之罪矣堯舜者天下之
英也朱象者天下之鬼一時之瑣也今世俗之為說者
不怪朱象而非堯舜豈不過甚矣哉夫是之謂鬼說舜

逢閭者天下之善射者也不能以撥弓曲矢中王梁造
父者天下之善馭者也不能以辟馬毀輿致遠堯舜者
天下之善教化者也不能使鬼瑣化何世而無鬼何時
而無瑣自太皞燧人莫不有也故作者不祥學者受其
殃非者有慶詩曰下民之孽匪降自天噂沓背憎職競
由人此之謂也世俗之為說者曰太古薄葬棺厚三寸
衣衾三領葬田不妨田故不掘也亂今厚葬飾棺故掘
也是不及知治道而不察於相不相者之所言也凡人

之盜也必以有為不以備不足足則以重有餘也而聖王之生民也皆使當厚優猶知足而不得以有餘過度故盜不竊賊不刺狗豕吐菽粟而農賈皆能以貨財讓風俗之美男女自不取於塗而百姓羞拾遺故孔子曰天下有道盜其先變乎雖珠玉滿體文繡充棺黃金充槨加之以丹矸重之以曾青犀象以為櫛琅玕龍茲華覲以為寶人猶且莫之扣也是何也則求利之詭緩而犯分之羞大也夫亂今而後反是上以無法使下以無

度行知者不得慮能者不得治賢者不得使若是則上失天性下失地利中失人和故百事廢財物屈而禍亂起王公則病不足於上庶人則凍餒羸瘠於下於是桀紂羣居而盜賊擊奪以危上矣安禽獸行虎狼貪故脯巨人而炙嬰兒矣若是則有何尤扣人之墓抉人之口而求利矣哉雖此僇而埋之猶且必扣也安得葬埋哉彼乃將食其肉而鬻其骨也夫太古薄葬故不扣也亂今厚葬故扣也是持姦人之誤於亂說以欺愚者而潮

陷之以偷取利焉夫是之謂大姦傳曰危人而自安害人而自利此之謂也子宋子曰明見侮之不辱使人不鬪人皆以見侮為辱故鬪也知見侮之為不辱則不鬪矣應之曰然則亦以人之情為不惡侮乎曰惡而不辱也曰若是則必不得所求焉凡人之鬪也必以其惡之為說非以其辱之為故也今俳優侏儒狎徒詈侮而不鬪者是詎知見侮之為不辱哉然而不鬪者不惡故也今人或入其央瀆竊其猪彘則援劍戟而逐之不避死


傷是豈以喪猪為辱也哉然而不憚鬪者惡之故也雖以見侮為辱也不惡則不鬪雖知見侮為不辱惡之則必鬪然則鬪與不鬪耶亡于辱之與不辱也乃在於惡之與不惡也夫今子宋子不能解人之惡侮而務說人以勿辱也豈不過甚矣哉金舌蔽口猶將無益也不知其無益則不知知其無益也直以欺人則不仁不仁不知辱莫大焉將以為有益於人耶則與無益於人也則得大辱而退耳說莫病是矣子宋子曰見侮不辱應之

曰凡議必將立隆正然後可也無隆正則是非不分而
辨訟不決故所間曰天下之大隆也是非之封界分職
名象之所起王制是也故凡言議期命是非以聖王為
師而聖王之分榮辱是也是有兩端矣有義榮者有勢
榮者有義辱者有勢辱者志意修德行厚知慮明是榮
之由中出者也夫是之謂義榮爵列尊貢祿厚形勢勝
上為天子諸侯下為卿相士大夫是榮從外至者也夫
是之謂勢榮流淫汙侵犯分亂理驕暴貪利是辱之由

中出者也夫是之謂義辱詈侮捥搏捶笞臠腳斬斷枯
磔藉靡舌繯是辱之由外至者也夫是之謂勢辱是榮
辱之兩端也故君子可以有勢辱而不可以有義辱小
人可以有勢榮而不可以有義榮有勢辱無害為堯有
勢榮無害為桀義榮勢榮唯君子而後兼有之義辱勢
辱唯小人然後兼有之是榮辱之分也聖王以為法士
大夫以為道官人以為守百姓以為成俗萬世不能易
也今子宋子案不然獨詘容為已慮一朝而改之說必

不行矣譬之是猶以塼塗而塞江海也以焦僂而戴太
山也踴跌碎折不待頃矣二三子之善於子宋子者殆
不若止之將恐得傷其體也子宋子曰人之情欲寡而
皆以已之情欲為多是過也故率其羣徒辯其談說明
其譬稱將使人知情欲之寡也應之曰然則亦以人之
情為欲目不欲綦色耳不欲綦聲口不欲綦味鼻不欲
綦臭形不欲綦佚此五綦者亦以人之情為不欲乎曰
人之情欲是已曰若是則說必不行矣以人之情為欲

此五綦者而不欲多譬之是猶以人之情為欲富貴而不欲貨也好美而惡西施也古之人為之不然以人之情為欲多而不欲寡故賞以富厚而罰以殺損也是百王之所同也故上賢祿天下次賢祿一國下賢祿田邑愿慤之民完衣食今子宋子以是之情為欲寡而不欲多然則先王以人之所不欲者賞而以人之所欲者罰耶亂莫大焉今子宋子嚴然而好說聚人徒立師學成文曲然而說不免於以至治為至亂矣豈不過甚矣哉



文編卷二十二